



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 7

Armando Sadiku-i Mohun Bagan SG  
den tenangzüktepba yanglu

Wagner sepaitem Belarus  
nung alitsü molungogo



VOL. XX NO. 253 (ADOK 253) DIMAPUR TENTONÜ (MONDAY) AAMI (JUNE) 26, 2023 ₹ 5.00

## Manipur CM-i Amit Shah den ajurutep

### Sorkari internet services shibangba atsülanger

**Imphal, June 25, 2023**  
(Agencies): Manipur Chief Minister N Biren Singh-i Deobarnü Delhi nung Union Home Minister Amit Shah den ajurutepa senden ka amen.

Idangji CM Biren-i Home Minister dang state indang osang lemsatepba den state o centre sorkartemi taoba hopta ka tsüingda tensa azüoktsü atema mapatem inyakba osang metetdaksü.

Centre sorkari Manipur nung tensa süngjemtsü atema akokba tashi mapa inyaktsü ta Union Home Minister-i nangzükba osang Biren Singh-i ashi.

"Tanü New Delhi nung Union Home Minister Amit Shah den ajurutepogo. Amit Shah lenisüba kübok state aser Centre sorkartemi taoba hopta ka tsüingda ozüing alema inyakba maparen azüokogo. June 13 nungi tenzükba Manipur nung ozüing alema inyaksangshiba maliasü" ta Manipur CM-i metetdaksü.

June 24, 2023 nü Delhi nung party ajak senden ka amenba sülen tanü N Biren Singh aser Amit Shah na ajurutepogo.

Iba senden nung Amit Shah-

i political lenirtem dang sorkari teinyaktsü mapa inyaktsü nangzükba liasü.

Külen, Manipur sorkari anogo pungunü- June 30 tashi internet shibangba atsülangtsü metetdaksüogo.

Public asoshi meinprong aser tensa raksatsüsa tatalokbatem ataloker. Iba ama mapang ka nung social media ajanga noksatem, tesempatep indang osang aser video belenshiba ajanga lendong bener arutsü akok ta Manipur Director General of Police-i metetdaksü.

Whatsapp, Facebook, Instagram, Twitter amala social media sabangtem aser tablets, computers & mobile phones amala electronic devices ajanga tiyazü aser taila osangtem prokshitsü akok. Anungji Temporary Suspension of Telecom Services (Public Emergency or Public Safety) Rules, 2017 nung Rule 2 kübok state sorkari mobile data services, internet/data services (including broadband) aser internet/data services maneni shibangtsü lemtetogo, ta Manipur DGP-isa ashi.

## Nagaland State Excise department-i sangoktsür

**Dimapur, June 23, 2023**  
(TYO): June 26, 2023 nü "International Day Against Drug Abuse And Illicit Trafficking" amongtsü aliba atema Nagaland State Excise department ajanga nübortemi meteta alitsü onük kar metetdaksüogo.

NDPS Act 1985 kübok ozüing noktanga aliba mozütem ayokkba/shibelenba noktanger. Iba aibelen asoshi küm 10 nungi 20 tashi tepuokdak ayutsü akok aser Rs.1 Lakh nung Rs. 2 lakhs senchi achitsü akok, mesüra temerenshi anaprong angutsü akok, ta Commissioner of Excise & Prohibition H. Atokhe Aye, NCS-i sangdong ka nung ashi.

NDPS Act kübok drugs atema ki, Warehouse, Godown, Vehicles amshiba putetra mesüra narcotic drugs miiimbanga ayuba putetra küm 10 nungi 20 tashi tepuokdak ayutsü aser Rs.1. lakh

nungi Rs. 2 lakhs senchi achitsü mesüra temerenshi anaprong angutsü ta Nagaland State Excise department-isa metetdaksü.

NDPS Act '85 nungsa India mesüra tangalen kasa maparen inyakba aiben putetra 'Death Penalty' agütsütsü lateta lir, ta parnokki ashi.

Drugs yokyayokchiba sen nungi aliba kiojen, rongsen, Bank Accounts/Bank balances ajanga NDPS Act kübok 'Frozen' asütsü ta parnokkisa ashi.

Taküm iba anogo ya UNODC omen- "People First: Stop Stigma and Discrimination, Strengthen Prevention" kübok amongtsü. Nagaland nung aliba nübortem aser teloktenji ajaki asen state nungi drugs khuret agientsü atema yariteptsü mepishir, ta Nagaland State Excise department-isa metetdaksüogo.

## Assam nung Khristantemi Manipur atema sarasademtsü

**Guwahati, June 25, 2023**  
(Agencies): Honibarnü Guwahati nung Assam Christian Forum (ACF) aser Conference of Religious India-North East (CRI-NEI) züngsemtemi Manipur nung yimjung alitsü atema sarasadem sentong ka agiogo.

Telok anaprong nungi lenirtemi Centre aser Manipur sorkartem dang yimjung bener arutsü, nübortem kümzükba ayutsü aser temeten agütsütsü atema teinyaktsü tim inyaktsü tayongzükba agütsüogo.

ACF ya Assam nung denominations ajak nungi Khristan tamangertem adenba telok lir. "Union home minister-i

semdangba sülen tensa süngjemtsü ta Manipur nung aliba sensotemi imlaa liasü. Ajsüüaka, tejashitsüka tensa memelenshi lir" ta ACF spokesperson Allen Brooks-i ashi.

Assam nung Khristan tamangertemi Tsüngrem dang mapa inyangka ta sarasademtsü atema longjemer, ta pai ashi.

"Tsüngremer mapa ajanga iba azütokshi anenjangma, teputep adokdakjangma aser asen lenirtem temeten aser putepshiba lenmang nung aniangma" ta Brook-i ashi.

Iba sentong ya Don Bosco School Playground, Guwahati nung Honibar nikongdang 3:30 ako nungi 4:30 ako tashi agi.

## Kohima nung Manipur nung timtemertem atema sarasademtsü



Deobar nikongdang Nagaland Baptist Church Council (NBCC) Convention Center nung Manipur atema sarasademtsüba sentong agidang tangokba noksa angur.

**Kohima, June 25, 2023**  
(TYO): Manipur nung tensa kanga mejungi akümba sülen anogo 54 tashi süika temelenshi kecha maliba atema tebilemstü bena Nagaland yimtiba Kohima nung Deobarnü sarasadem sentong ka ayonga agiogo.

Kohima Baptist Pastors' Fellowship-i "Candlelight vigil - standing in prayer for the neighbouring State" ta ser sentong ya taonung Nagaland Baptist Church Council (NBCC) Convention Center nung ayongzükba agi.

"Zübotem aneptsütsü atema süiki ia bilemer shinga mali ama lir. State mesüra Centre sorkartemi süiki ia mebilemer" ta NBCC general secretary Rev Dr Zelhoh Keyho-i ashi.

"Iba sentong ya asenoki tai aputsü, tai tongloksütsü mesüra tensa raksatsürtem jangjatsü atema masü saka timtem nung aliba adianutem asoshi sarasademtsütsü aser asenok parnok den külemi lir ta sayutsü atema lir" ta Rev Keyho-i ashi.

"Lendong balala nung taküm samar kibongtem den mangyim lemsateper. Tsüraburtem kidangi meyipa maruba tanurtem aser tanurtem kidangi meyipa maruba tsüraburtem asoshi onoki nüktzü ayimer" ta pai metetdaksü.

"Pei talidak makartem aser tenem o lenden nung relief o shelter camps nung jenoka alirtem asoshi onoki sarasademtsür. Pei tasoli toktsür bendanglen oa jenoka alirtem asoshi onoki sarasademtsür. Timtem tia balala ajurua alirtem asoshi onoki aria bilemstür" ta Rev Keyho-isa ashi.

Iba mepetmesü nung tenla ki aser arogo kiojen nunga teka aiba atema sarasademtsü. Mangatettep adoka raratepdang tamangba yimsü ka dak tenük yoka inyakba ya tim masü, ta paisa ashi.

"Memenundang iba tensa ajuruba tera bushitsüla aser tangatettep kati arutsü atema mapa inyaktsüla. Sorkari kanga dang kümdanga kin o kin tsüingda rara ya anendaksütsü ayongzükba" ta NBCC general secretary-isa

metetdaksü.

Manipur nung kin ajak kasa kümzükba ayutsüla. Onokisa Centre sorkar dang mapa inyaktsü aser nübortemi tamang akatsü mapa inyaktsü ayongzükba, ta paisa ashi.

"Kuki aser Meitei nung dang olemtep sabangi arutsü, külemi shisalemsateptsü aser sensaksemstü mepishir, kechiyong tatem nungbo nenok adianutem amasa liyonga aotsü. State ka nung külemi alitsü aser kidanger ama dang alitsü" ta Rev Keyho-isa ashi.

"Ozüing alema inyakba anenang aser tesempatep o olulu prokshiba anenang. Ozüing alema inyakba agi tajung kecha majangzüktsü, tesempatep prokba agi tesempatep dang alitsü" ta paisa metetdaksü.

Iba sentong nung KBPF general secretary Dr Ruokuoville Sachü-i anir Manipur nung timtemertem asoshi sarasademtsü. Parnokisa kin ana lenirtem aser sorkar ketdangpurtem asoshi Tsüngremer temoatsü meshitsüogo.

## NBCC aser NTC-i UCC atema tebilemstü abener

**Dimapur, June 25, 2023**  
(Agencies): India nung Uniform Civil Code (UCC) yanglutsü atema Law Commission-i sendaktepa alir balala dang nungi tebilembatem meshiba mapang ka Nagaland nung arogo aser kin telok anati UCC magizükba metetdaksüogo.

UCC mapa tenzükba nübo agi tangar memenepertemi pei tamangba yimsü mamangtetsü ta Nagaland Baptist Church Council (NBCC)-i ashir.

Külen, Nagaland Tribal Council (NTC)-ia UCC ajanga Constitution indang Arlla 371A nung aliba onüktem menentsütsü ta shiogo.

Parliament indang Act kechaia Naga nung tamangba mesüra

lokti inyaksangshi, Naga customary law and procedure dak sendakba nung mekongshitsü ta lateta lir, ta NTC-i metetdaksüogo.

"UCC ajanga lisopurtem aser tamangba yimsü nung nübo agi tangar memenepertem indang temeten nung kongshitsü" ta NBCC-isa ashi.

Centre-i UCC yanglutsü merangba ya nübo agi tangar memenepertem lokti, sobaliba aser tamangba yimsü temetentem nung teka aitsü merangba lir, ta NBCC general secretary Rev Dr Zelhoh Keyho-i sangdong ka nung ashi.

UCC mapa tenzükba Constitution nung Arlla 25

raksatsütsü aser iba ajanga freedom of religion agütsür ta paisa ashi.

Arlla 371A nung mekongshitsü atema UCC maparen nung Nagaland medendaksütsüla ta NTC-i takhangba agütsüogo.

"December 1, 1963 nü India nung state 16 buba ama Nagaland nem Statehood agütsü, iba ya 16 Point Agreement of 1960 ta ajaba political agreement ajanga agütsüba liasü" ta NTC-i ashi.

"Iba agreement ajanga Constitution of India nung Nagaland state atema Arlla 371A balaka latetsü" ta NTC-i 22nd Law Commission dangi züluba shidi nung shia lir.

# LFI nung Investiture Ceremony 2023 agiogo



**Dimapur, Aami/June 25 (TYO):** Kaketshir nem lenir mapa nungloksütsü nükjidong nung Livingstone Foundation International, Dimapur indang Students' Council atema Annual Investiture Ceremony ka LFI Basketball Court nung June 24, 2023 nü agia liasü.

Taküm iba sentong nung Students' Council Leaders indang tsürabur aser kinungertem adenba ajanga sentong tali metsünga-reta agia liasü.

Iba sentong ya Vernon Fernandez lenisüba kübok agia liasü, kong Viravono Chase-i sentong tenzüka sarasadem aser tsürabur rongnungi Acato Chishi-i school flag songa liasü. Iba sülen Director LFI, Ani Yepthomi-i sentong indang milen tsükloka liasü.

Sentong nung Ani Yepthomi-i tarur pela agizükba o jembidang tsürabur, tsayur aser lenir tasentem ajungshia liasü.

Lenir tasentem nem tenüngsang agütsüba mapang

school-i parnok dak tamang akaba indang lai shia liasü.

Lai parnok dang yimya tajung amshitsü aser temolung agüja inyaka, timtem nung alirtem aria bilema aser akumtsüboa inyaksü aser saksalema alitsü ayongzüka liasü.

Pei jangraba nung masü saka kaketshir temi temolung lemtetsüsa inyaksü ayongzüka liasü.

Tsürabor aser kinunger temi pei tanur lenmang balala nung ajungshia tanurtem shisatsü angudak ka ama aliba atema lai tenüngsang agüja liasü aser ano tanurtem den tali yaritepa school ajungtsü mechi parnok tangatetba lemsateptsü ayongzüka liasü.

Students' Council Election takok ngua agitetba atema lai tsayurtem dang pelaba lemsatepa liasü.

Iba sülen Director, LFI, Ani Yepthomi ajanga kaketshir lenirtem tezüngzüktep agiba maparen ketdangsüa agia liasü aser iba sülen tsürabor aser

kinunger temi shimteta aliba kaketshir lenirtem nem "leaders' badges" inokja liasü.

Taoba mapang ama taküma School Boys & Girls Captains, House pezü indang Captains & Vice Captains, class balala indang Monitors & Asst. Monitors aser hostel dormitories balala indang Prefects & Sub-Prefects tem nem mapa balala nungloka liasü.

Matthew House nungi Grade-XII Arts nung azünger Henjoy Ham taküm asoshi School Captain (Boys) aser Luke House nungi Grade-XII Arts azünger Anna Zimo ya School Captain (Girls) shima liasü.

Iba sentong nung LFI Girl Boarders temi 'Stand Strong' nüngja agütsür ken ka aten aser Grade-XII Science nungi Kakupu-ia temeja ken ka tena liasü.

Sentong nung tsürabor nungi Dr. Martha Mpom ajanga melepzüng o jembia sentong tembanga liasü.

# Dimapur nung nisung ka train agi menüngset

**Dimapur, Aami/June 25 (TYO):** Arishi küm 40-45 shi tain non-local tebur ka June 24, 2023 nü Avadh Assam (train No. 15909 DN) agi SM Office, Lane -1, Railway Station Dimapur anasa menüngset aser tasü mang ya rail track nung lia ngutet, ta Dimapur Police sangdong ka ajanga ashi.

Ozüng agi melaba maparen ajak tembangba sülen tasü mang ya PM examination/

jangjatsü atema Dimapur District Hospital Morgue nung yua lir.

Iba nisungba ya sentsü tamang, long pant sentsü tanak, t-shirt 'orange' sentsü semer liasü.

Kibur/kinunger/tembar temi Officer-in-Charge, Sub-Urban (SBN) Police Station, Dimapur den Mobile No. 7085055026 ajanga tongteprateptsü akok, ta sangdong ajanga ashi.

# Excise Narcotic ajanga Sunflower/Heroin apu

**Dimapur, Aami/June 25 (TYO):** Dimapur yimti kübok Supermarket area nung temesepba mozü shibelenba osang lazükba nung ajemdaker Excise Narcotic personnel indang duty party kati mita aoba mapang Phuba Khuman, Senapati, Manipur nung alir L. Dasou (55 yrs) S/o Luzii Kapumai ket nungi Sunflower (Heroin) sepa aliba sapon boxes 20 apu, ta Dy. Commissioner of Excise (NC), Nagaland ajanga Deobarnü sangdong ka nung ashi.

Iba temesepba mozü ya pa indang 'carry bag' nung bena aliba nguteta liasü.

Iba nisungba ya itangiisa apu aser NDPS Act 1985 indang tapet ozüng kübok pa anema ken o benoka lir. Iba ken o tang bushisü ngudang tesü dak lir. Duty party nungya Atilo Kent AIE lenisüba kübok Excise Constables Khumeng, Alice



asir Kamnei nungertem liasü.

Temesepba mozü chia-ajemba aser ozüng alema shibelenba azüoktsü asoshi parnoki meranga inyakba atema tenüngsang agütsür, ta sangdong ajangasa ashi.

# East Dimapur Council kübok alir nem Solid Waste Management training agütsütsü

**Dimapur, Aami/June 25 (TYO):** Ajak asoshi libajen temürekba aser tajungba kumdaksütsü nükjidong nung Solid Waste Management indang Home Crash Course Training ka council jurisdiction kübok alir ajak asoshi agitsü, ta Administrator, East Dimapur Council, Mhalo Humtsoe-i sangdong ka nung metetdaksü.

Iba training nung kilen shia nisung nisung ka-ka adentsüla, ta sangdong ajanga ashi.

Iba crash course mapang jana-reja anepaluyim, jana tabu balala aser itemji ajanga libajen menentsüba, jana indokba, recycling & composting techniques aser jana kumdanga indokba onüktem nung ajemdaker jembitsü.

Training ya ward telungzü

nung anogo-mapang lemsar agitsü. Training takok ngua tembangba sülen jana takong aser tai bendentsü asoshi dust bin tem angati agütsütsü, training nung shilem agir ajak nem kulizüng kakat agütsütsü, kong code number ka alitsü aser ibaji amshia East Dimapur Town Council aser GB tem nungi teyari balala agitettsü.

**Iba training atema anogo aser mapang telemsa yamai alitsü:**

- 26/6/23 Ward No.1-Zion Ward; Ward- II Model Ward (Venue: Sumi prayer fellowship, Model ward; Time: 9:30 AM)
- 27/06/23 Ward No.3- Jorapukhuri (Venue: East Dimapur Town council office at Purana Bazaar market; Time: 9:30 AM)
- 28/06/23 Ward No.4- New Ward (Venue: Sumi church, Sunday school, Purana Bazaar; Time: 9:30 AM)
- 30/06/23 Ward No. 5 Mount View (Venue: Council Hall, Purana Bazaar; Time: 9:30 AM)
- 03/07/23 Ward No. 6 High school (Venue: Council Hall, Purana Bazaar; Time: 9:30 AM)
- 04/07/23 Ward No. 7- Middle Colony (Venue: Sumi Community Hall, Middle Colony; Time: 9:30 Am)
- 05/07/23 Ward No. 8 Naharbari Unity (Venue: Chakhesang Baptist Church; Time: 9:30 AM)
- 06/07/23 Ward No. 9- Naharbari Highway (Venue: Council Hall; Time: 9:30 AM)
- 07/07/23 Ward No. 10- Naharbari Valley (Venue: Head GB resident; Time: 9:30 AM)
- 10/07/23 Ward No 11- Upper Naharbari (Venue: Chairman's resident; Time: 9:30 AM).

# Assam Rifles temi Ghaspani nung aliba War Memorial nung naroyutsü



**Dimapur, Aami/June 25 (TYO):** Assam Rifles temi nungi sepai züngsem 142 aden aser parok dang Asür Daya Sagar Rfn (GD) Daya Sagar Sagar Arya-i pa taküm Arya nem akum agüja pa leper nung naroyutsü sentong ka Unit War Memorial, Ghaspani nung agia liasü.

Asür Rfn (GD) Sagar Arya ya Kupwara, J&K nung June 25, 1990 nü duty nung alidang taküm bendanga agüja liasü.

Iba sentong nung Battalion

asir Kamnei nungertem liasü.

Iba Unit nungi teshimtet nisung ka Bounli village, Almora Dist, Uttarakhand nun goa Asür Daya Sagar Arya tebu Bachi Ram den ajurutepa akum agüja liasü.



Lorin Hall, Tetso College Dimapur nung send of concert ka June 25, 2023 nü ayongzüka agidang Nagaland Chamber Choir ajanga ken tajung ka atenba noksa nung angur. Nagaland Chamber Choir yagi Gangneung, South Korea nung July 3-13, 2023 anogotem World Choir Games alidang shilem agitsü.

### PM Modi aser Egypt Tir Sisi na senden amen; MoU ka sign asü



June 25, 2023 nü Egypt yimtiba, Cairo nung India Ato kilonser, Narendra Modi-i Al-Hakim mosque semdangba mapang tangokba noksa nung angur.

#### Cairo/New Deklhi, June 25 (Agencies):

Amongnü Egypt yimtiba, Cairo nung India Ato kilonser, Narendra Modi aser Egypt Tir, Abdel Fattah El-Sisi na senden amenba mapang nung linük ana tsüingda shishilembaba aser investments, energy aser nüburttem tesendaktep ano tajungba akümtsü atema jembio, ta ketdangsertemi metetdaksü.

Tir, El-Sisi-i Presidential Palace nung Modi agizükba sülen tena senden amen.

Osang angazükba agi, Abdel Fattah El-Sisi-i Narendra Modi nem 'Order of the Nile' award agütsü; iba award ya Egypt nung tematiba award lir.

Lenir anatisa Memorandum of Understanding (MoU) ka sign asü.

Amongnü Narendra Modi-i Al-Hakim Mosque-a semdangogo. Cairo nung aliba Al-Hakim Mosque ya küm 1,000 tejaklen yanglu, aser iba mosque ya India nung Dawoodi Bohra Muslim nung teyari ajanga yanglushia liasü.

Modi-i anogo pezünü US semdangba sülen Honibar nikongdang Egypt tonga ao aser Amongnü nikongdang Delhi tonga aruogo.

Honibarnü Modi-i Egypt Ato kilonser Mostafa Madbouly leniba nung India Unit ajurua liasü. India Unit ya El Sisi-i linük ana (India-Egypt) tsüingda tesendaktep tajungba akümtsü atema tentetba high-level ministers telok lir.

Cairo nung India nungertemi Narendra Modi agizükba sülen Honibarnü pai Egypt nungi

shisashirtema kar ajurua liasü. Modi-i Middle East aser North African region nung Egypt nung company tulu ka nung CEO Hassan Allam, nüngtugu kaketzülur Tarek Heggy, petroleum strategist Prof. Shawky Ibrahim Allam, Grand Mufti of Egypt aser yoga instructors- Reem Jabak aser Nada Adel nung ajurua liasü.

Taküm January 26 nü New Delhi nung Republic Day anogomong sentong nung tongti tejaokerji Egypt Tir Sisi liasü. Pai India semdangba mapang nung Modi tenati linük ana tsüingda tesendaktep jenjang ajungketa asalentong tsütsü partnership yanglutsü telemtetba agia liasü. Iba mapang nungjisa Egypt Tiri Modi dang par linük semdangtsü asüingdanga liasü.

### Light power methitemi agütsüba state ji Telangana dang lir: KCR

Hyderabad, June 25 (Agencies): Telangana Chief Minister, K Chandrasekhar Rao (KCR)-i, linük nung electric light khen danga methitemi agütsüba state ji Telangana dang lir aser maneni tajungba akümtsü atema nüburttem dang nungi temoatsü aginer, ta metetdaksü.

Hyderabad anasa Patancheru yimti nung super specialty hospital ka amenoktsü atema foundation lung azüngtsüba sülen osangbenertem den jembidang

pai, linük nung per capita income teimtibaji Telangana lir, ta metetdaksü.

"Iba state tentetba mapang nung Telangana anema olulu aika proka liasü. Tangbo India nung domestic, industries, commercial mesüra agriculture atema light power khen danga methitemi agütsüba state ji ka dang lir (Telangana)," ta pai metetdaksü.

Sangareddy district kübok Patancheru Constituency nung Chief Minister, KCR-i super-specialty hospital amenoktsü

atema lung azüngtsü. Iba hospital ya talisa industry balala nung inyaker kibongtem nüngdak apir lapoktsü.

Iba hospital amenoktsü atema sen crore 184 lemzüksüogo.

KCR-i Kolluru, Ramachandrapuram Mandal nung state sorkari sütsüba 2-BHK colony semzüksüogo. State sorkari ali acre 140 nung ki 15,600 sütsüogo aser item ki semzüksüba nüngtem nung Chief Minister-i kibong kar nem 2-BHK ki lema agütsü.



June 25, 2023 nü Goa yimtiba, Panaji nung G20 Tourism Working Group senden alidang Union Minister of State for Ports, Shipping & Waterways & Tourism, Shripad Y. Naik aser UK Minister of Tourism, John Whittingdate na jurila senden ka amendang tangokba noksa nung angur.

### Amarnath Yatra jakdang Jammu-Srinagar highway nung security asadang

Jammu, June 25 (Agencies): Hindu nunger tamangertem temeshi aini aoba 'Amarnath Yatra' atongtsü mapang ana nung lia Jammu zone nung Additional Director General of Police, Mukesh Singh-i Jammu-Srinagar national highway nung aliba jila aika semdanga security jenjang asadangogo, ta osang ka ajanga metetdaksü.

Mukesh Singh den police tongti ketdangsertemi Lambar-Banihal, Ramsoo, Ramban aser Chanderkot semdanga security jenjang asadang.

Temeshi aini aoertem mezüngbuba telokji June 30 nü Jammu kübok Bhagwati Nagar nung aliba base camp nungi Kashmir-i apusoa aotsü.

ADGP Singh-isa CRPF aser Army ketdangsertem den osang balala metetpelaba den külemi tetuyuba aika agütsü. Temeshi aini aoertem kecha

tetsübu makai sadoksadoka senzütetsüsa kanga tongtibang tesemtem nung sepailemzüksütsü aser temeshi aini aoertem tajungtiba nung anepalutsü tuyua liasü.

Paisa J&K State Disaster Response Force (SDRF) sepaitem dang kanga yakyaka alitsü aser tzi-mopung lendong süaka nisungi agütsüba lendong süaka lendong atalokra tekaratiba nung kümzüksüba maparen inyaksü tuyuogo.

ADGP den Deputy Inspector General of Police (Doda-Kishtwar-Ramban), Sunil Gupta aser Ramban District nung Senior Superintendent of Police, Mohita Sharma nata liasü.

Ano külen Samba District nung Senior Superintendent of Police, Benam Tosh-ia security agencies balala den senden ka mena Amarnath Yatra atema security jenjang asadang.



June 25, 2023 nü Mumbai nung tzungluruwa mongpu tenükba anogo nung nisung kati tzunglu ajaa khu bener aoba noksa nung angur.

### Opposition-i party ajak nungi telok kati Manipur semdangtsü akhang

New Delhi, June 25

(Agencies): Honibarnü Union home minister, Amit Shah-i Manipur tensa atema jembitsü ayongzükba senden nung opposition party temi party ajak nungi teshimtet telok kati Manipur semdangtsüla ta takhangba agütsü, saka sorkari telangzüba magütsü.

Iba senden nungji Congress-ibo tangsa N Biren Singh Chief Minister menden nungi anentsütsüla, ta akhang aser Samajwadi Party den party kari Manipur nung President's rule benoktsüla, ta takhangba agütsü liasü.

Iba senden nungji Home minister Amit Shah-i, Manipur nung rara anener yimjung alitsü atema Ato kilonser Narendra Modi-i tuyuba ama ajak inyakdar ta shiogo, ta BJP Manipur in-charge Sambit Patra-i osangbenertem nem metetdaksü.

"Home minister-isa, iba state nung rara tenükba sülen pai anogo shia Ato kilonser Modi den iba tensa atema jembio, mesüra Ato kilonseri tuyuyuba magütsüba anogo ka danga maliasü ta shiogo," ta Sambit Patra-i metetdaksü.

Amit Shah-i ayongzükba senden nungji BJP, Congress, Trinamool Congress, DMK, AIADMK, Aam Aadmi Party aser Left densema party aika

aden.

Iba senden nung adenertem rongnung BJP Tir JP Nadda, taoba mapang Manipur chief minister Okram Ibobi Singh (Congress), Derek O'Brien (TMC), Meghalaya CM Conrad Singh (NPP), Sikkim chief minister Prem Singh Tamang (Sikkim Krantikari Morcha), Birendra Prasad Baishya (Asom Gana Parishad), M Thambi Durai (AIADMK), Tiruchi Siva (DMK), Pinaki Misra (BJD), Sanjay Singh (AAP), Manoj Jha (RJD) aser Priyanka Chaturvedi (Shiv Sena) nung densema liasü.

Parliament House complex nung ghonda asem senden amenba sülen osangbenertem den jembidang TMC MP, O'Brien-i, "Patna nung (opposition) lenirtem senden amenba sülen ghonda 24 tsüingda Opposition-i obang ka ser Manipur, northeast aser India atema jembio," ta ashi.

Trinamool Congress-ia, hopta ka tsüingda party ajak nungi teshimtet telok ka Manipur-i yoktsüla, ta takhangba agütsüba den külemi iba tensa maziüktetba atema sorkar aitsü.

Osangbenertem den jembidang Ibobi Singh-i, chief minister N Biren Singh leniba sorkari iba tensa maziüktetsü, anungji tangsa chief minister melentsüla, ta ashi.



## TIR YIMYIM YIMOBILEM (EDITORIAL)

DIMAPUR TENTONÜ, AAMI (JUNE) 26, 2023

### India ya tilaba akümtsü !

**T**ang yimsü tesüdak BJP teloki aniba government-i jangraba amato India nung kin tuluba, kasa oshi jembir teimba aser tamangba yimsü amanger telok tuluba apia linük temzüng ozüng latettsü merang nungbo memenui India ya akhidang Union of Soviet Socialist Republics (USSR) jaksaa aoba amato aotsü ana nung lir. Alima yimten otsü bushirtemibo meteta lir, 1991 küm tashibo USSR ya India ama alima kin tuluka liasü aser iba kübok, India nung state ta amshiba amato, Republics 15 liasü. Ajisüaka, yimten tashibo Party kati dang, aji Communist Party of the Soviet Union, USSR yimtiba Moscow nungi yimsüsüa liasü. USSR kübok aliba Republic shia nung asenok ama pei pei oshi lir saka yimten oshibo Russia dang amshia aru. Aji oda, pei pei oshi, sobaliba aser tamangba yimsü liaka, Moscow nungi dang Communist Party-i kechi latettsüdir itemji dang amshitsüba dak alaka USSR kübok aliba Republic-tem mulung asütsüsa kecha mali asü. Iba jagi alima nungbo yimten tashi wangshitepba nung US serbo USSR dang liasüba, USSR kümer küm 69 buba nung Republic 15 agi alima balala küma sükshia aoba nungi tanübo ano Russia o Ukraine na raraba asenoki angur. India nung, talisa, tang Narendra Modi aser Amit Shah nati aniba BJP government nung lenirtemi India ya Hindi jembir aser Hindu yimsü dak amanger kisüng dak rangloker temzüng ozüng tasen tasen lateta yimsü asütsü merangra, ashiko, memenui USSR agi alima tilala küma aoba ama ataloktsü. Alima nung oshi ya peisasa pei kini yangluba masü, saka ishikati jembiba oshi asütsüa akok mesüra aikati jembiba oshi asütsüa akok, item oshi ajakji Tsüngremi agütsüba lir, anungji teimba purtemi ishinba purtemi jembiba oshiji samatsüsa mesenmetua mamshii akümtsüba oshi ajak nem temeten agütsütsü tim. Ano, oshiji dang masü saka alima nung nisungtem meimtepa aser yaritepa alitsü atema tamangba yimsü ya kanga tongtibang lir, kechiyong tamangba yimsü yagi nisung taküm madak kibur ka lir ta angatetdaksür. Iba kiburji Tsüngrem. Ajisüaka, alima asünungji nisungtemi Tsüngremji pei pei tangatetba yari külemer. Ajisüaka, koba Tsüngrem külemdir külemang, iba tamangba yimsü jagi tangar asoshi tajung tajung dang inyaksü sayur. Ibayongji, tamangba yimsü ka aitsür ka metentsüsbaji tim masü akümer. Atangji, alima kin kar nungbo tamangba yimsü ka dang amangtsü atema yimten temzüng nung lateta yur amangdaksür. Ajisüaka, India ama ka nung tamangba yimsü ka dang amangdaksütsüsa yimten temzüng latettsübaji tamakoktsü, kechiyong India nung ya alima nung nisungtemi amangba tamangba yimsü ajak aremoka lir aser item tamangba yimsü ajakji amangtsü, benshitsü aser sayutsü temzüng nung temeten agüja lir. Tamangba yimsü yagi mapa inyaksüba mapang aser anogo, chia-ajemtsüba indang, kibalembutsü aser balalulatsüba maparen ajak nung telatet aser tetuyuba agütsür. Aji oda, kin shia aser tamangba yimsü balala amanger telok shia pei pei sobaliba aser pei pei tamangba yimsü tesayuba nung ajemdaker mapa inyakba anogotem, chia-ajemba aser kibalembuba yimya aser maparen ajak laleta benschia aoer. Ajisüaka, kodang item ajakji sobaliba ka aser tamangba yimsü ka kübok alirtem ama kasasa kümdaktsütsü merangdir, aji melinür o melinür na kangshia alentepa yutsü amai asütsü, anungji melitettsü. Tanü India nung center government-i India ya kin ka dang, anungji India nung senso ajak asoshi sobalibaren dak aketba inyakyim ajak temzüng ka kübok kasasa (Uniform Civil Code) asütsü meranger. Ajisüaka, iba sentong yabo India tajungba küma yangluba sentong ka masü saka India telongjem ya, akhi USSR ama, jaksaa aotsüba sentong ka asütsü. Tanübo India ya Tamil nung, Sikh nung, Kashmir nung, Bengali nung, Khasi Garo nung, Assamese aser Naga nungertem agi küma lir. Aji oda, tanü India ya Hindu, Muslim aser Khristan-tem agi küma lir. Itemji kodaser kasa temzüng ozüng ka agi pei pei sobaliba benschia otettsü ? Hindu nungertem India ajunga Hindu nung kümdaktsünüba atema kecha masü, aji tim dang saka ozüng agi India nung ajunga Hindu nung sobaliba küboki aيتدaktsütsü merangra, iba jagibo India ya tilaba aser tashimaitba dang akümtsü.

## OLEMSABANG

### KIBONG NUNG NÜNGDAKBA JENJANGTEM

~ Mrs. Amenla Amlari

#### OKILA:

Kibong ya meimchiri purabojia tentetba ka masü saka Tsüngremi Eden tsüki nung tentettsüba lir. Dr. Dehan-i ashiba agi, "Kotak atongtsü anasatiba tesemji Khristan kibong lir." Ano scholartemi ashir, "Kibongji University tulutiba." Sociologist-temi ashir "Kibongji Lokti ajak yangludak Kimong." Kanga junga shisadangra aser reprangdangra Kibong ya kanga dang jenjang keta asen Teyanglur Tsüngremi tentettsü. Saka tanü tesasatsüka jenjang makai kibongtem jenti raksaa Tsüngrem asoshi aser alima asoshi tajangzük magütsütetba asenoki angür. Ashiko Satani Arogo aser Lokti raksatsütsü asoshi tezubatiba lenmangji kibong ya raksatsütsüla ta tangatetba nung kibong dak kongshir südi ta bilemer. Iba yongji tanü kibongtem aika nung jenjang (Values) koba agi kibong tashi itdaksür aser Kodak mesüka yangerteter itemji samaa aoer, aser kibong tentetba nükjildingji mataloktsür mesüra Tsüngremer sentongji mataloktsüteter. Anungji iba Ocet ya ajanga tongmelang agi Tsüngremi mulungba Kibong ka amentetsü asoshi komala jenjangtem nüngdaker itemji kar lemsateper.

#### KIBONG NUNG NUNGDAKBA JENJANGTEM (Values):

- 1. Tsüngrem O meimba Jenjang:** Dr. Benjamin Spock-i ashiba, "Tsüngrem shibaikibong tentettsü Pai züluba kaket aikati consult masür." Laishiba koba Tsüngrem O lir idaki kibong koda yangertsü iba indang tetuyuba aser shisatsü tabensa lir sürnung tanü kibongtemi Tsüngrem O keta sena mazünger aser iba nungi teyari magir, iba jagi aseni alima tayongzükbatem mokokteter. T.ken 119:105 nung Tsüngrem O ji asen tetsüng asoshi milen aser lenmang asoshi tesangwa ta shia lir. Tanü alima ajak tammang aser terata agi sünger aliba tensa nung Tsüngrem O jagi dang asen kibongji len anitsü, Tsüngremer telatet Ozüng nungji jajatetsü, aser Temenen tongpang ajakji koktetsü. Ajak dak alia asen kibong jagi Teyanglur sentongji atalokdaksütettsü. Anungji kibong tamendakdakji Tsüngrem O ji südaktsüdi aser iba Tsüngrem O nung tera yangdaksüdi, aji oda süra kibongji tia ajak nung akanga noktaktettsü aser temenen tatsüba ajakji koktettsü.
- 2. Sarasademba Jenjang:** Nüngtugu sayutsünger D.L Moody-i ashi, "Sayutsünger tajung ka asütsü agibo sarasademer taküm ang sünüali," ta ashibaji odang ashiba masü. Sarasadem Tashi ya ulura aser iba tashi yagi dang kibongji yangerteter. Sarasadem ya kibong asoshi Tangula asütsüla. Meimchir taküm alitsü asoshi tangula koma tongtibang yamaji kibongji taküm alitsü asoshi sarasademji kanga tongtibang. Kibong ya Tsüngremi tentettsü saka ibaya kanga dang tashi mait (Fragile) anungji sarasademi dang kibongji anepalutsüla. Aji agi Yisui ya Luke 18:1 nung "Tezü metangi sarasademang" ta shia lir. Kechiaser taküm tongpang ajak koktetbaji sarasadem tashiji lir aser iba yagi dang mojing sang nungi jenbudaksür. Takokba kibong akümtsü asoshi maneni sarasademba kibong ka asütsü nüngdaker.
- 3. Tsüngrem Tsübuba Jenjang:** Yob 28:28-i ashir "Ajiang Kibuba akhüm tsübubaji temetetba shisatsü lir." Nisung shiba shisatsü lir pai dang Tsüngrem metetba kibongji yangertetsü aser Tsüngremer miim tarok mapatem jungkai adoktsür. Tsüngrem tsübuba temenen sempar (A.shin 8:13). "Kibuba tsübuba temerük (T.ken 19:9b)." "Kibuba tsübuba taküm tzüpokdak"(A.shin 14:27) "Kibuba tsübuba jagi taküm leni anir; Aser shiba aka tiptema alitsü; tamajungi pa mesemdangtsü"(A.shin 19:23). Hauni alima tashi temetetjia kibong yangerba nung kangasa tongtibang ako saka iba kisüng jagi yangerba kibong jagi Tsüngrem sentsüwangshidaktsütsü makok. Temerüktet kibong, temenen sempaba aser taküm tzüpokdak kibong ka süa tiptema tamajung kechaia mesemdangi lidi ta süra asen Kibongi Tsüngrem tsübuba jenjang ya wazüka yudi, ya Tsüngremi mulungba lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Nagaland Baptist Church Council-i Uniform Civil Code magizüker

**Dimapur, June 25 (TYO):** Linük nung Uniform Civil Code (UCC) benoktsü atema maparen inyakba Nagaland Baptist Church Council (NBCC)-i magizüker; iba ya tang Centre nung aliba sorkari minority tem loktiliba, sobaliba aser tamangba yimsü temedentem aziüoktsü atema lir, ta NBCC General Secretary, Rev. Dr. Zelhou Keyho-i sangdong ka ajanga metetdaksü. "Iba ya tanga kecha masü saka parnok tajangzük angutsü atema tribals aser nütsüing

ajema aliba aziüoktsü atema lir. Talisa tribals aser minorities indang tera kanga junga yangerteta aliba loktiliba-sobaliba aser yimsü dak sendakbatem ozüing yanglushira ibaji linük nung minorities indang temedentem anema inyakba mapa asütsü," ta kasa sangdong ajanga metetdaksü. "Uniform Civil Code ajanga tamangba yimsü mesüra kin kecha tebandang makai senso ajak atema kasa ozüing benoktsü, anungji NBCC-i ibaji sashia anemer. Iba ozüing ya

agizükra linük temzüing nung tamangba yimsü atema temeden agüja aliba Arrla agienadoktsü," ta kasa sangdong ajanga metetdaksü. "Tamangba yimsü aser tamangji nija ka tangatetba lir, anungji itemji 'code' asütsü makok. Secular linük ka nung tamangba yimsü dak sendakba ozüing benoktsü makok. Secularism ya India nung democracy tashi lir, ta ratetja alibaji kodanga mamadoktsüla," ta kasa sangdong nung shia lir. *(Maneni tapak 8 nung...)*

# Lenmang nung sayutsüingir nüngtugu, Ruben Israel süogo



Ruben Israel

**June 25, 2023:** Lenmangtem nung sayutsüingia senzür nüngtugu, Ruben Israel kanga ajungbena Honibarnü (June 24) alima nungi pilaogo; pa arrshi küm 62 liasü. Amongnü pa indang official Facebook page ajanga par kinüngertemi, pa ajungbena Hombarneq 5:00 ako meta alima nungi pilaogo, ta metetdaksü. Par kibongi sangdong ka ajanga, "Kiniüingbu ka, tebu ka aser uncle ka ajungbena asüba

ajanga onoki mangyimer. Ajisiüaka pa Tsüingrem tenzüker tajung ka liasü, anungji tang pa Tsüingrem den lir ta amanga onok melung süneper," ta lemsatop. Tesüiba küm 30 dak tema Ruben Israel-i lenmangtem nung sayutsüingia jaja aser mapang shia Evangelical Christian organization Bible Believers den külemi inyak. Israel-isa Street & Open Air Preachers of America

organization den-a külemi inyaksema liasü. Pai ozülu tulu amer nisungtem dang temenen nungi meyipang ta ajungshia aru. Paisa Islam yimsü, jabujariba aser tanur raksa-a indokba anema odiodia jembia liasü. 2012 küm June ita nung Ruben Israel den par medemer kar Dearborn, Michigan-i oa Arab festival nung Muslim nung sayutsüingiba ajanga Muslim nung aikati pa aitsüba den külem parnok dak lung agi aondang pa mejungi yirua liasü. Iba tatalokba anema pai security anema ken o benok aser 2015 küm October ita nung U.S. 6th Circuit Court of Appeals-i Israel aser Bible Believers medenja obendang agütsü. Pa asütsü hopta ka dang lia pai twitter ajanga pai Salt Lake City, Utah semdanga LGBT sentong ka nung sayutsüingiba lemsatopa liasü.

# ANOGO ABEN TSÜNGREM DEN

## Tatem Makai Ainba (T.Ken 110:1-7)

Yimya agi tangar sensaksema angaa alitsübaji yimya tajung masü, awashi memetetba lir saka T.Ken 110 nung asenoki aji inyaksü akok ta ashir. Asenoki tebu Tsüingremi techir Tsüingrem den jembiba angashir. "Kibubai kü kibur dang ashi, na kü teka tachichilen menang, ni ne tsükchir ne tsüing ajemmetdak mekümdaksür tashi" (t.1). Ibai Tasen Lai nung aiben amshiba angutsü, iba yagi Kibuba Yisu Khrista kodang Kotaki meyipa tudir Chuba tachichilen amentsü indang jembir. Tebu Techir sensaksema jagi asenok dang kechi ashir? Mezüingbuba iba yagi asen Kibuba tamaren indang ashir. Pa sentsüwangshia kotaki atu. Pai sarasadem, "O Oba, ali meyangludang ne den alidang ni kechi sentsüwangshi liasü iba sentsüwangshi jagi nai pei den ni sentsüwangshidakjang" (Yn. 17:5), aser Tsüingremi aji inyak. Tebu Tsüingremi Techir Tsüingrem nem Pa merenba agütsü, aser Pa tang Kotak nung Chuba- Putir lir. "Na taküm tepiyong putir asütsü, Melkizedek koma yamaji alitsü" (t.4). Tejen Lai putir chuba menden nung amenba asenoki kecha nunga mangutsü, saka Yisu Pa tamarenba nung Pa asen Chuba aser asen Putir lir. Asen chuba ama asenoki kechi inyaksüla Pai ashir. Asen Putir ama inyaksü asoshi Pai asenok nem tashi agütsür. T.Ken 110i ano takok indang jembir- Pai raraji akok. "Na kü tachichilen menang, ni ne tsükchir ne tsüing ajemmetdak mekümdaksür tashi" (t.1). Iba jagi nai akokba tashi ajemalua akümtsü indang ashir. Asen Kibubatakokba lir. Pai tongpangji akok. Pa Takoker lir, Chuba tem madak Chuba aser Kibuba tem madak Kibur. Idakji asenok asoshi tetsübu mali. Iba ken yagi ano tenzüka indang jembir. Chuba menden nung amenertemi tangari parnok tenzükdaksüner. Yisu den yamaji masü. Pai asenok tenzüker. Tatemsa, ken jagi asenok jenokdak indang jembir. "Pai asenok asoshi mepishitsütsü teti taküm ali nung Pai ajak nung jungjunga parnok kümzüksü akoker" (Ibri 7:25). Pa taküm ali tashi, asenok taküm alir aser aji teti taküm maka alir. Khrista chubatem madak Chuba asünung Pai takok angur. Pa Temaba Putir asünung Pa asenok jenokdak lir kechiaser Pai asenok asoshi mepishitsür. Nai Yisuji ne Kümtetdakba ta metetta lir ma? Pa ne Chuba aser ne Putir asü ?

# Chuchuyimlang Town Baptist Arogo nung VBS ayongzüka agiogo

**Chuchuyimlang town (Mokokchung), June 25 (TYO):** Chuchuyimlang Town Baptist Arogo Sunday School Ministry-i ayongzüka June 23 nungi June 25 nü tashi anogo asemnü Vacation Bible School (VBS) kanga takok ngua agiogo. Anogo asemnü sentong ya 'Stellar; Shine Jesus Light' omen nung ajemdaker agi, aser iba sentong nung tanur 87 tashi shilem agia aden. VBS ya shidakba agibo anogo pongunü course liasü, saka tanurtemi anibelem aremzüka mapang tali agisemba ajanga anogo pongunü course ji asemnü nung dang renema tanur ajak nem certificates den sempet balala agütsüogo.



June 25, 2023 nü Chuchuyimlang town Baptist Arogo nung VBS tembangba sülen tesayurtem aser tanurtem külemi tangokba noksa nung angur. Telung noksa nung temoatsü sentep sentong Christian Education Director, Mrs. Ayangla-i Tsüingrem O jembidang (abelen) aser tanurtemi shilem agidang tangokba angur.

tanurtem atema dang masü saka taintem atema-a lir, ta ashi. "Tila tanurtemji Tsüingrem tsüingdang kanga dang senti lir; yamaji tsüraburtem atema-a tanurtemji kanga senti, ajisiüaka asenok tsüraburtemi tanurtemji

kanga senti ta aiben amadoker aser tanurtem nem mapang magütsüteter," ta lai ashi. "Tsüraburtemi peii jangraba sentong balala nung jajadang aser pei tejangraba inyakdang aiben tanurtem sendoka toktsür,

ibaji asenoki kanga shisadangtsü nüngdak. Tsüraburtemi tanurtem nem mapang peria agütsüteta Tsüingrem sentong nung tanurtem anitsü nüngdak," ta lai tsüraburtem ayongzük. Anogo asemnü VBS nung

tanurtem atema sentong telemsa yamai agia liasü- Sing & Play Station, All star games station, Imagination station, Bible adventure station, Galactic Snacks Station aser KidVid Cinema station.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rateplitep**

(adv) kin, kidong aser tamangba yimsü balala meyoktepa libalirua aoba (cross culture)

\*Tanü putu nungbo lanurtem rongnung **rateplitepa** aotsü ajungshitsüla.

**Ratepshitep**

(n) osangtsüsang tapu balala mopong ajanga shishitepa (networking)

\* Tanü putu nung **retepshitep** aliba agi tongteprateptsü melara kümogo.

**OLONG PAITEP # 6557**

1		2		3		4	
		5		6		7	
8							
		9					
	10						
						11	12
		13			14		
15				16			

**TIPLÉN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. \_\_\_ adenshi - (4)
- 14. Tsünüsenbongtsü adokdak - (3)

**OLONG PAITEP # 6556 TELANGZÜBA**

**TIPLÉN :**

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

**LANGTSÜNGLEN :**

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar,
- 12. Tinu, 14. Salem, 15. Aja,
- 18. Anünü, 19. Tajü, 21. Ano,
- 22. Onü,
- 23. Kua.



**YANGKO AMOR KA (PICKPOCKET)**

**MOTORBIKE KA DEN TSÜKTEPER LAOA LIA POLICE ARUR.**

**Police** : Kwa koma atalok?  
**Yangko amor** : Pai motorbike ji kangasa karaa anir arua kü dak tsükoktsür ajena.  
**Police** : Pa indang bike numberji terakata ajitet asü majitet?  
**Yangko amor** : Bike numberjibo majijonga saka pa indang wallet bo amozükteta he sir!  
**Police** : Good, ajijaja!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**

Happy Birthday

1. Tenüng : .....  
2. Tasoba anogo: .....  
3. Küm : ..... 4. Class : .....  
5. School : .....  
6. Talidak : .....  
7. Salem osang : .....

**Conrad Sangma-i Centre dang Manipur atema inyaktsü ayongzük**



Conrad K Sangma

Shillong, June 25, 2023

(Agencies): Meghalaya Chief Minister Conrad K Sangma-i Centre sorkar dang Manipur nung tensa süngjemdaksütsü asoshi mapa inyaktsü ayongzükogo.

Meghalaya CM aser National People's Party (NPP) national president Conrad-i Union Home Minister Amit Shah dang iba ya ashi.

Manipur nung mepetmesü ajanga timtemertem nem relief materials peria agütsütsüla ta Meghalaya CM-isa ashi.

"Onoki India sorkar dang nübor nem relief materials aser essential commodities agütsütsü ayongzükogo. Tesem ajaklen aser talisa relief camps dangi supply shitak yoktsüla" ta Conrad-isa ashi.

Political party ajak, telok balala aser tamangba yimsü teloktemi Manipur nung tensa süngjemdaksütsü atema nübor ajak nem osang sangoktsütsüla, ta paisa shisem.

Ozüng alema inyakba telungpur teloktem dak özüng tapet agi merenshütsüla aser India sorkari parnok azüoktsüla, ta Meghalaya Chief Minister-isa ashi.

**L. ALI TZÜDIR**  
**KÜM 80 AJUNGBA ANOGO 26-06-2023**

Aikati metongtetba kümsük 80 abensaba koba lier (40) anasü, iba senti alizüng tongtetba atema asen kibongi Teyanglur Tsüngrem nem akhüm, tetushi aser tematiba tenüngsang agütsür.



Ano Tsüngremi na arishi talang den anema aliba taküm moajang ta sarasademer.

"Tsüngrem asenok asoshi lira asenok anema shiba ali?"

~ Rom 8:31

~ Kinungtsü, Patong, Rapilar aser Semchirtem.

**Shah-i Sarma dang tzümetsüng atema yaritsü nangzük**



Guwahati, June 25, 2023

(Agencies): Union Home Minister Amit Shah-i Assam Chief Minister Himanta Biswa Sarma den tzümetsüng khuret atema jembio.

Amit Shah-i CM Sarma den phone ajanga jembidang Centre-i Assam nem tzümetsüng atema teyari agütsütsü nangzük.

Assam nungeri iba ama timtem ajuruba mapang Modi'er sorkar nenok den dena lir ta Shah-i ashi.

"Tzünglu kanga aruba agi Assam kübok shilem kar nung tzümetsüng timtem ajurua lir. Ni CM Himanta Biswa den jembio aser akokba tashi teyari agütsütsü nangzükogo. NDRF teams Assam tongogo aser relief

& rescue operations inyakdar. Ano nübo talila renema lir" ta Amit Shah-i metetdaksü.

Assam nung Deobarnü tzümetsüng tensa balaka memelenshi mejungi lir. District 9 nung nisung lakh 4 shi timtemer, ta ketdangsür kati ashi.

Assam nung tzümetsüng shilem mezüngbuba nung nisung 3 taküm samaogo, ta Assam State Disaster Management Authority (ASDMA)-i metetdaksü.

Baksa, Barpeta, Darrang, Dhubri, Goalpara, Kamrup, Lakhimpur, Nalbari aser Udalguri district tem nung tzümetsüng agi nisung 4,07,700 kongshia lir ta ASDMA report ajanga ashir.

**Manipur nunger 2 ket nung Rs 18 crore jenjang heroin apu**



Guwahati, June 25, 2023

(Agencies): Kamrup (Rural) district kübok Hajo police-i Rs18 crore alang heroin puogo.

Assam police-i nisung ana ket nung heroin seret 2.2 bena aliba apu. Tenati

sapon pongdang 165 nung heroin enoka aliba heroin ji enoker bena liasü.

Tena ya Manipur nunger Abdul Hassan aser Mustak Ali na ta jangjaogo aser tenati inter-state drugs cartel ka nung shilem agir.

Tena mena aliba gari

nung heroin enoka aliba sapon pongdang 100 shi angu aser tena kidang nungi ano sapon pongdang 65 ngutet.

Assam police-i tena arrshidang Hajo nung lungren ka nung gari tsükok.

### MOLUNGNEN O

Onoki meima aliba Obala asür N. Amongba shiranga aliba mapang aser tasüba anogo mangyim jashi nung alidang, kinungertem, t e m b a r t e m , kiyongertem, lokti balala aser temeimer s h i r n o k i s a sarasadem, rongsen, nebu aser tsüngdong arua yaritepogo, nenok ajak dang kanga pelaba lemsateper.

Nenok temeim onoki kodanga mamatsü. Tsüngremi nenok tali moajangma ta ozü sarasadem.

- Temeim Kinungtsü, Chirnur, Semchir aser Kinungertem.



Asür N. Amongba (Molungkimong)  
Tasüba Anogo : 20-06-2023

### MENUNGRA BILEMTETER



Asür Sünkumlong Jr. (M.Yimti)

Nai onok toktsür küm 2 süir. Mapang ka nungbo ki bushia arutsü ama aser akumli rongnung tensema aki ama yongyaseta liasü, saka ya asangsang, Alongba teti asoshi anisüngzük tagi or, saka onoki nü temeim, teyarinü, tejembinü, yimya tajungtem bilemteta kinunger metemer ajaki na onok molungjang nung teti lia longrar.

### Syria nung opposition-i amokbanger aliba jila ka amak

**Jisir Al-Shughur, Aami/June 25 (Agencies):** Deobarnü northwestern Syria nung aonsotsü shishilembadak ka tayimtsü amshia amakba sülen nisung teku süogo, ta activists aser local first responders temi metetdaksü.

"Kanga mejungi yirur alirtem mozüki atongba sülen süatoker ta onoki angashidar," ta White Helmets nungi Ahmad Yaziji-i Associated Press dang ashi.

"Aonsotsü ayokba tesem tongtiba dak rangloker makogo, kong northern Syria nungi aluyimertem adenshir," ta paisa ashi.

Activists aser Britain nung amendaker aliba opposition war monitor; Syrian Observatory for Human Rights-i ashiba agi, Russia koba Syria tir Bashar Assad tembar lir parnoki Turkey arrtsü anasa opposition-i amokbanger aliba Jisir al-Shughur maka liasü.

Lendong atalokba sülen aluyimertemi yirur alirtem parnok indang garitem nung inoker anir ao aser activists temi azü tenlatsü atema ayongzüka liasü.

Iba tesem amakba dak sendakba nung Syria mesüra Russia-i kecha telangzüba magütsü ajisüaka Damascus-i ashiba agi, northwest province nung tesemtem amakba ya telungpur dak rangloker amakba lir. Northwestern Syria ya timba ka Hayat Tahrir al Sham telungpurtem aser Turkey-i teyari agütsüba teloktemi aziüoka lir.

Moscow indang mercenary telok kati Russia tir Vladimir Putin anema apusoba sülen anogo ka lir iba tesem maka liasü.

Syria indang civil defense organization shirnok dang White Helmets ta ajar parnoki ashiba agi, iba lendong nung nisung 30 dak tema yiruogo aser ano asürtem timba aküimtsü imlar.

### US indang Ronald Reagan aircraft carrier Vietnam tongogo

**Hanoi, Aami/June 25 (Agencies):** China nunger rongtem Vietnam tzüyim nung inyaksangshiba indang Hanoi-i ashishiba sülen hopta ishika lir United States indang aircraft carrier Ronald Reagan, Veitnam kübok Danang tongaogo.

2016 küm international court-i nine-dash line ya temzüng ozüng kübok tamendakdak maka ta shiogo ajisüaka China-i iba obendang sülen manidaker.

Vietnam dak alia Philippines, Malaysia aser Brunei-ia iba tzüyim nung tesem karbo parnok meyong ta shia arudar.

Küm ter tejakdang tesendaktep asoshi tenangzüktepa yangluba sülen US aser Vietnam na shishilembaba tsütsü aser iba tesem temeket nung China kanga tashi ita akümba dak sendakba nung tesendaktep akangshitsü atema merangba mapang ka nung tang iba rong yagi Vietnam semdangogo.

Vietnam rara tembangba aser taoba ita Indian naval rongtem Danang-i aoba aser Japan indang warship tulutiba Cam Ranh-i Vietnam semdangba sülen nuclear-powered USS Ronald Reagan ya US aircraft carrier kati iba linük tasembuba semdangba asütsü.

China nunger survey vessel ka, coast guard indang rongtem aser anogpudang amshiba rongtem aika South China Sea nung Vietnam indang exclusive economic zone nung hopta aika inyaksangshiba sülen Vietnam indang foreign ministry-i parnok iba tesem toktsür aotsü asoshi tetuyuba agüja liasü.

US aircraft carrier ya Danang nung June 30 nü tashi anenzüktsü.

Washington-i iba tesem nung maneni tashi ita linüra US aser Vietnam na tsüngda tesendaktep tajung ayutsüji US atema kanga tongtibang lir, ta Phuong-i ashi.

Rongtem ya June ita tetenzüklen iba tesem toktsürogo. China-i South China Sea kübok tesem timba ka parnok meyong ta shia arudar aser rongtem yokba den asetkongtem aser reefs aser outcrop tem nung military facilities tem yanglua arudar.

US Secretary of State Antony Blinken-i April ita Hanoi semdangogo aser pai diplomatic tesemdaktep akangshiner ta shiogo.

US aircraft carrier kati mezüngbuba Vietnam semdangba ya 2018 küm USS Carl Vinson liasü aser iba sülen 2020 küm USS Theodore Roosevelt-i Vietnam semdangba liasü.

### SANGDONGER



Mezüng Ao Naga Baptist Arogo Mungdang, ANBAM (1897) nung tenzükba Arogotem rongnungi Molungyimsen Baptist Arogo aser Lirmen Baptist Arogo telongjem sentong tajung ka June 14 & 25, 2023 anogotem Tsüngrem temoatsü agia liogo. Tarutsü nunga Tsüngremer wadang asoshi tamang telongjem aser teyaritep nung alitsü Arogo ana sannükertem aser Arogo tenzükertem sarasadema longjemshiba osang yimnasanger aser amangbapurtem dang sangdonger.

Rev.S.Tajung Pastor  
Molungyimsen Baptist Arogo

Rev. A. Mar Pastor  
Lirmen Baptist Arogo

### Wagner sepaitem Belarus nung alitsü molungogo

**Moscow, Aami/June 25 (Agencies):** Sen yong raraba Wagner sepai tekolakba Yevgeny Prigozhin-i par telok dang Russia nunger azüdokshi mesüdaksütsü mechi Moscow bushia aoba anentsü totutuba agütsüogo aser Belarus nun goa alitsü molungogo, anungji Tir Vladimir Putin-i küm aika Russia nung yimsü süa arudang tayongzükba tulutiba ka tatem kati arur.

tem bushia aor." Sen yong raraba sepai leiri anir private army tem aruba nokdangtsü asoshi Moscow nung iba yimti south tsütsü checkpoints amenoka armoured vehicles aser sepaitem yoka liasü. Red Square shibang aser Moscow indang mayor-i gari nung senzürtem dang lenmang kar nung mekakatsü ajungshia liasü.

Wagner telok ajungbena sorkar anema nokdakba ya Russia indang armed forces temi kanga sashia menokdangtet amai ajiteter, anungji iba telok meyipa aotsü telemtetba agiaka Putin-i nuclear nok nü aliba linük nung tashi amshiba nung tasüngdangba arur.

Belarus Tir Alexander Lukashenko-i Putin den jembiba sülen Wagner sepai tekolakba den parnok Moscow-i meyipa aoba anendaksütsü asoshi tetsüngtai ia jembia liasü.

asertensa tamajungba mekumdaksütsü asoshi mera agütsü Lukashenko-i maangka agütsüba Progozhin-i agizük aser tang jembiba ken o nung Wanger sepaitem asoshi 'security guarantees' dena lir, ta Lukashenko office ajanga ashi.

Prigozhin-i Kremlin dang Defence Minister Sergey Shoigu mapa nungi anentsütsü akhangba ama Kremlin-i langzü asü masüar mejangja.

Iba tezüngzüktepa nung shilem ka ama Wagner tekolakba ya kidanger linük, Belarus-i aotsü aser pa anema ken o benoka alibattem shibangtsü, ta Kremlin-i Honibarnü ashi.

Sorkar anema nokdakba nung Prigozhin den adener par sepaitem nema temerenshi magütsütsü aser pai sorkar anema nokdakba nung madener nem defence ministry ajanga contracts agütsütsü, ta odongtar Dmitry Peskov-i ashi.

(Maneni tapak 8 nung...)

Wagner telok aoba anentsü

# 2nd Inter District Shooting Championship osang



**Dimapur, Aami/June 25 (TYO):** 2buba Inter Sistrict Shooting Championship June 21 nungi 24 tashi Aries Sports Complex Shooting Range, Bamunpukhuri-1, Dimapur nung asayaogo.

Iba asayamung ya Aries Rifle And Pistol Shooting Academy, Khelo India Centre, Dimapur-i ayongzük aser Nagaland Rifle Association-i achaayanga liasü.

Iba asayamung nung Dimapur, Kohima, Mokokchung,

Chümoukedima, Peren nungi ajak senteper shooter 64-i (tetsür 18 aser tebur 46) asaya 27 nung shilem agia liasü.

Asayamung nung Dimapur district-i medal 33 ngua parnok

ajak dang temaba jenjang nung liasü aser parnok sülen Mokokchung-i medal 17, Kohima-i medal 15, Chümoukedima-i medal 3 aser Peren-i medal 1 ngua liasü.

Medal tally yamai alitsü:					
Sl. No.	DISTRICT	Gold	Silver	Bronze	TOTAL
1	Dimapur	12	12	9	33
2	Mokokchung	7	7	3	17
3	Kohima	7	3	5	15
4.	Chümoukedima	1	1	1	3
5	Peren	-	-	1	1
<b>Total no. of Medals</b>		<b>27</b>	<b>23</b>	<b>19</b>	<b>69</b>

## Nagaland Baptist Church Council-i...

(Tapak 5 nungi...)

"Law Commission-i tangatetbatem asüngdangbaji tebilemba kanga tajung, ajisüaka India ya tamangba yimsü aser sobaliba aika aliba linük lir. Linük nung loktilibaji kanga tebenja. Kin, sobaliba aser tamangba yimsü balala aika lir aser ajakji longjemba ajanga asenok ya linük tajung ka lir. India nung kanga tongtibang yimsü karbo tenzük aser asen linük nung alima nung aliba yimsü balala amangertem ajak lir. Ajisüaka secularism ajanga asenok longjemdaksür, anungji ajak tesünep nung maneni kümlemi litettsü atema secularism maneni alitsüla," ta NBCC-i

metetdaksü. "Linük nung tamangba yimsü, loktiliba aser sobaliba balala tejakleni aotsü atema maongka agütsütsüla. Ajisüaka Uniform Civil Code ya majority-i linük nung minority teloktem aziüoktsü atema lir ta aikati angateter. Iba ya tanga kecha masü saka tekübokba jenjang nung alirtem aser teloktem temeden agientsü atema lir," ta NBCC-i metetdaksü.

"Khristantem atema onok Laishiba lir aser Khristantem koma libaluruttsü, item ajaki onok indang temeshi kaket nung shia lir, aser iba nungji khenyongi atsü-anemtsü makok. Iba mera

(UCC) agiba ajanga kechi ataloktsüar NBCC-i meteta dang lir," ta NBCC-i metetdaksü.

"Nütsüng teimba aliba teloki parnok indang loktiliba, sobaliba aser yimsü dak sendakba inyakyimtem minorities matsüngdang benoktsü. Iba ya telok ka indang puti otsü tanaben zülushitsü atema lir, aser ibaji mapangtem süia arudang tejangjaba meteta kümogo. Iba dak sendakba nung NBCC-i iba maparen atema inyaksangshiba anema nokdaksü aser India-ia ibaji matalokdaksütsüla," ta NBCC sangdong ajangasa metetdaksü.

## Wagner sepaitem Belarus nung...

(Tapak 7 nungi...)

Putin-i molungba ama Lukashenko tetsüngtai aita ken o jembitsü asüngdang, kechaser pai Prigozhin den kanga junga metetteper küm 20 shi jungogo, ta Peskov-i ashi.

"Azüdokshi, linük telung nung mangatetep adokba aser raraba paidoktsüji nükjidong tulutiba liasü."

Wagner sepaitemi linük south tsütsü mitkartem aliba tongtipang tesem ka rakzüker Russia yimtiba tsütsü aoba ya Putin-i küm 22 tashi Russia nung yimsü asüba mapang tebilemstsü tulutiba liasü. Honibar aonung Wagner sepaitem aser hadir tem Russia nung Rostov-on-Don yimti nungi bener ainshia liasü.

Prigozhin-i akhangba ama Putin-i Shoigu ya defence minister menden nungi atsüngdoknungbo Prigozhin

asoshi takok tulu asütsü aser Putin tashi anokshitsütsü.

Prigozhin-i makhangtsü molungtepra, Putin-i taoba mapang ama pa nem government contracts tajung agütsütsü.

Ajisüaka Putin-i Prigozhin ya tesülen nungi mapa tamajung inyakba ashikülaker ta shir ano Wagner tekolakba den jungtepra yimtenren tsütsü pa asoshi timtem tulu asütsü.

Prigozhin-i par Wagner Group ya federal authority kübok yutsütsü mesüra pai Africa-i meyipa yoktsü akok, ta aikati asadanga liasü, kechiaser yangja küm ishika par sepaitem kanga yakyaka arur.

Putin-i linük den jembiba television ajanga jembidang Wagner telok sorkar anema nokdakba ya linük ashioktsüba

maparen ka lir, ta shia liasü.

"Sorkar anema nokdaksü renema alirtem ajak nem kechi südir süaka temerenshi agütsütsüsa. Armed forces aser danga sorkar agencies nem nüngdakba totuyuba agütsüogo," ta Putin-i ashi.

Ketdangsür temi linük yimtiba aser temeket region nung "counterterrorist regime" sangdonga security akangshi aser senzüsempogba kar nung tenokdangba agüja liasü. Moscow south tsütsü sepaitemi checkpoints tem amenoka lisem sepa aliba juli benden aser machine guns amenoka liasü.

Wagner sepaitemi yimsüsür anema nokdakba ajanga linük nung mepetmesü aliba temai adoka sayur, ta Ukraine Tir Volodymyr Zelenskyy-i Honibarnü shia liasü.

# Kezo-i ANTA HQ Kohima 1st Open Carrom Tournament kokogo

**Kohima, Aami/June 25 (TYO):** All Nagaland Taxi Association (ANTA) HQ Kohima-i ayongzükba 1buba Open Carrom Tournament Kohima nungi Mhasekhoyi Kezo-i kokogo. Iba asayamung ya ISBT, Regional Taxi Parking Kohima nung asaya liasü.

Kija asaya final board asayaba mapang Kezo-i Kohima nungisa Besuto Nienu madak takok ngua liasü.

Iba asayamung akoker nem senpet sen 25,000 aser runner-up nem senpet sen 15,000 agütsüogo.

Kija asaya nung semifinal tonga asayaba asayar ana nem senpet sen 5000 agüja liasü.

Kija asaya atema senpet ya 9th Kohima Town AC MLADr. Tseilhoutuo (Ato) Rhutso-i agüja liasü.

Tarep asaya Dimapur nungi Daniel Achumi aser Apulo Awomi nati akok aser tena nem senpet sen 30,000 agütsü aser Niuland nungi Vikheho Katy aser Inaho Zhimo na tanabuba jenjang nung tembanga tena nema senpet sen 20,000 agütsü.

Semifinal tonga asayaba tarep Besuto & Victor aser Boaz & Abeto nung nema senpet sen 7000 (team shia) agütsü.

Tarep asaya atema senpet ya Mezhüvolie Solo (1st Prize), Akhrieno Suohu (2nd Prize) aser Ropfü Meyase (semi finalists) nungeri agüja liasü.

Kohima Village Youth Organization executive züngsem Ketholhoutuo Belho-i asayamung shibangba sentong nung takok angurtem nem senpet agüja liasü.

Asayamung shibangba sentong ya Secretary ANTA HQ Kohima Victor Rutsa lenisüba nung agia liasü.

Kasa mapang nung Association-i senpet tenla agütsürtem, asayamung nung shilem agirtem aser asayamung nongita yarirtem ajak dang kanga pelaba lemsatepogo.

Iba asayamung nung Kohima, Niuland, Dimapur, Chumoukedima aser Phek nungi asayar 72-i shilem agia liasü.

## Armando Sadiku-i Mohun Bagan SG den tenangzüktepba yanglu



**Aami/June 25, 2023 (TYO):** Mohun Bagan Super Giant-i Albania nung centre forward Armando Sadiku den küm ana atema tenangzüktepba yangluogo, ta club sangdong ka ajanga Deobarnü metetdaksü.

2016 küm Euro nung Albania-i otsütsüsa goal ka agi Romania akoba asaya nung goal ka ya arishi küm 33 tain asayar yagi idakja liasü.

Hugo Boumous aser Dimitri Petratos na den Sadiku densemba sülen Mohun Bagan nung attacking kanga tashi ita kümogo. Club-i ano A-League indang Central Coast forward Jason Cummings alizüktsü imlar. Osang ajanga ashiba agi, Finish mid-fielder Jaoni Kauko yirur aliba mapang shidak nung taneptsü mongutettsüsa akümba sülen pa toktsütsü akok.

"Spain nung India nung football asaya indang tajung dang jembir. Spanish league nungi asayartemi iba linük nung asaya aser league jenjang

ajungba indang sanga jembio. Mohun Bagan-i kü den tongtepratepba sülen ni ISL nung asayatsü jangra aküm aser iba league indang tali metettsü meranga liasü," ta Armando Sadiku-i ashi.

"Ni bushisüngdangba sülen club achaayangertem dang hopta ka tsüngda ni India nung asayaner ta shia liasü.

"Ni teammate tasentem den onoki ISL tanaben akoktsü imlar. Iba den bendenloksema kü nükjidongji tanga asayamungtem nunga takok marnok aika angutsü atema club nem teyari agütsütsü asoshi lir," ta paisa shisem

Sadiku ya tesüsa La Liga 2 club FC Cartagena nungi asaya liasü aser tang pa indang market value sen crore 5.6 lir.

Sadiku-i, Albania tenung nungi 38 ben asayaogo aser iba mapang pai goal 12 idakja liasü.

Kasa mapang nung Mohun Bagan puri tawa Anirudh Thapa küm pongu atema alizükogo.

### BILEMDANGANG

"Langka tasen angazüktsü asoshi kecha temonu mali."